

Bouônjour mes bouonnes gens. Ch'est Clive Jones tch' a l'pliaîsi d'vos présenter la Lettre Jèrriaise aniet, lé dgix d'Mai 2025.

L'Înconnu du Nord-Express (or Strangers on a Train)

J'aime bein viagi auve lé train, mé. Jé n'veurs pon dithe lé mînséthabl'ye viage d'pis l'aéroport vèrs la ville. Nânnîn, j'pâle d'un viage dé plusieurs heuthes où'est qu'nou peut vaie un mio d'la campângne.

Quand jé d'meuthais en Suisse à Zuritch j'avais à visiter plusieurs offices et j'prannais l'opportunité d'viagi auve lé train à touos buts d'camp. J'viagis à Genève, à Milan, à Francfort et même à Paris.

Ch'tait un pliaîsi d'viagi aînchîn. Nou n'a pon à abandonner san bagage, ni s'alîngni pour la sécurité. Nou peut liéthe un mio (i'y'avait tréjous des choses dé l'office à liéthe), nou peut vaie la campângne et nou peut mangi – auve eune vraie assiette, et d'la vraie coutell'lie !

Et, à la fin du viage, nou-s'est au centre dé la ville, sans aver à attendre san bagage et auve un court trajet à l'hôtel.

Dans san célèbre film « L'Înconnu du Nord-Express » dé 1952, Alfred Hitchcock suggéthit qué deux înnonnus pouôrraient faithe lé «crînme parfait » si châque înnonnu assâssinait la pèrsonne la pus dêtestée par l'autre înnonnu.

Heûtheusement j'n'eus janmais eune telle convèrsâtion dans l'train.

Malheutheusement ch'est aussîn vrai qu'autcheune belle femme né s'assiéthit janmais vis-â-vis d'mé dans l'train et c'menchit à tricoter auve mé. (Eh bein, pon hardi souvent, quand même.)

Mais i'y'avait eune fais où j'eus eune convèrsâtion hardi rare auve un homme dans l'train.

Ch'tait en Novembre 2023. J'avais 'té à l'Assemblée Générale dé l'Association dé Dgides Touristique à Neuchâté au Nord-Êt dé l'Angliétèrre. Natuthellement j'dêcidis d'viagi à Londres auve lé train.

À Darlington un coupl'ye montîtent à bord. L'homme portait un fa d'un hardi bouôn couôthouthyi, eune quémînse bïanche et eune cravate bein élégante. Il pâlait l'Angliais aue un accent hardi raffiné. Et bein, tout entouor li mé criyait « étrangi ».

Auprès un p'tit brîn jé c'menchînmes à pâler. Lé coupl'ye 'tait en route pouor Nouveau York pouor gangni des sou pouor lus charité, et pis siez-ieux. Jé d'mandis où'est qué ch'tait siéz-ieux. J'attendais Londres, Nouveau York ou p't-êt Athènes. J'n'attendais pon la réponse « Zagreb ».

J'tais surprîns. Pouortchi Zagreb ? jé d'mandis.

Auprès un court arrê, i' r'prînt san vent et d'livrit eune réponse tout à fait inattendue.

« Bein », qu'i dit « man pèthe 'tait l'rouai Peter dé Sèrbie ».

J'tais êbahi : j'tais à pâler aue sén Altesse Rouoyale lé Prînce Alexandre dé Sèrbie, lé prince héthitier !

I' m'expliyitchit qu'i fut né dans Suite 212 dé Claridges Hotel en 1945 où'est qu'sa fanmil'ye d'meuthit auprès fiêsi lus pays duthant la dgerre. Son pârrain 'tait lé rouai Georges VI et sa mâraine la princesse Elisabeth, pus tard la reine Elisabeth II.

La légende raconte qué Winston Churchill offrit à dêcliather Suite 212 comme territouaithe Sèrbe à fin qu'l'êfant fûsse né « en Sèrbie ». Mais i' n'y'a pon d'preuve dé chute légende. Eune aut' légende 'tait qué tchiques gens d'la cour posîtent un sèrveur dé tère dé Sèrbie souos l'liet d'la reine aue la même întention. Autcheune preuve là nitout. Chein qu'est vrai est qu'Suite 212 est tréjous là. Achteu oulle est Suite 214, la « Suite Alexandre. »

Et s'ou voulez vaie la suite où'est qu'lé prînce héthitier fut né, mes bouonnes gens, ou n'avez qu'à téléphoner à Claridges Hotel et boutchi eune suite pouor deux'trais jours !

Et achteu, vivant qu'i' n'étha janmais la possibilité d'êt' rouai, li et sa femme s'dévouent à lus travas charitabl'yes.

Jé caqu'fînmes jusqu'à Londres où'est qué j'nos s'pathînmes. Mais, tchiques s'maines pus tard, j'èrchus eune carte dé Noué du Palais Rouôyal à Zagreb aue un photo du coupl'ye dedans.

Bein, nou n' sait janmais tchi qu'nou peut rencontrer sus l'train...